

दिनांक : 02.02.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- मुख्यमंत्री भजनलाल शर्मा केंद्रीय बजट ने नुवो भारत बणावण अर खुद रे पाण ऊबी माली व्यवस्था रो संकल्प सांचो करण वाळो बतायो।
- रेल मंत्री अश्विनी वैष्णव केन्द्रीय बजट रा बारा मांय खबरनवीसां ने बतायो— बजट मांय उत्तर-पश्चिम रेलवे ने 10 हजार 228 करोड़ रुपया देवण रो प्रस्ताव।
- संसद रा दोन्यू सदनां मांय राष्ट्रपति रा अभिभाषण परां धन्यवाद प्रस्ताव माथे चर्चा सुरू व्ही।

अर

- मौसम विभाग बांसवाड़ा, बारां अर भीलवाड़ा जिलां मांय बारिश व्हेवण अर ओला पड़बा सारू चेतायो।

000

मुख्यमंत्री भजनलाल शर्मा केंद्रीय बजट ने नुवो भारत बणावण अर खुद रे पाण ऊबी माली व्यवस्था रा संकल्प ने सांचो करण वाळो बतायो है। श्री शर्मा आज वां रा दफ्तर मांय खबरनवीसां सागे बातचीत कर रह्या हा। वे कहयो के बजट मांय नुवा भारत री उम्मीदां पूरी करण सागे आखिरी छोर माथे ऊबा हर एक जणा ने आगे लावण रा संकल्प रो ई पूरो ध्यान राख्यी ज्यो है। मुख्यमंत्री कहयो के नौजवानां माथे खास ध्यान देवण वाळा ई बजट मांय युवावां सारू काम-धंधा, स्किल विकास, स्टार्टअप ने बधावो देवण अर सर्विस सेक्टर माथे ध्यान देवण रा प्रावधान करी ज्यो है।

मुख्यमंत्री कहयो के बजट मांय महिलावां ने मजबूत बणावण, हिफाजत अर माली व्यवस्था मांय भागीदारी बधावण, खेती-बाड़ी ऊँ जुड़्या बुनियादी ढांचा अर बाजार ताई किसानां री पहुँच बधावण अर वां रो जोखिम कम करण सारू केई प्रावधान करी ज्यो है। श्री शर्मा कहयो के बजट देश रा छोटा-मोटा कारखानां, सामान बणावण वाळां, कारीगरां अर कामगारां ने दुनियाभर रा बाजारां मांय जगह बणावण सारू नुवी दिशा बतायी है। बायो फार्मा, केमिकल्स, टेक्सटाइल, हैंडलूम अर हैंडीक्राफ्ट सरीखा हलका मांय उत्पादन बधावण सारू बजट मांय केई खास प्रस्ताव करी ज्यो है। वे कारखाना लगावण वाळां ऊँ बजट मांय लायी ज्यो खास योजना रो फायदो लेता थकां प्रदेश रा औद्योगिक हलकां मांय इकाइयां लगावण बाबत कहयो। मुख्यमंत्री कहयो के ई बजट मांय राजस्थान री संभावनावां अर जरूरतां रो पूरो ध्यान राख्यी ज्यो है। श्री शर्मा कहयो के अक्षय ऊर्जा सारू 30 फीसदी बत्तो करीब 32 हजार 914 करोड़ रुपया रो आवंटन करी ज्यो है जद के पीएम सूर्यधर योजना सारू 22 हजार करोड़ रुपया राख्यी ज्यो है।

मुख्यमंत्री कहयो के राज्य सरकार हाल ही सेमीकंडक्टर नीति, एआईएमएल नीति अर डेटा सेंटर नीति लागू कीनी है, ई कारण इंडिया सेमीकंडक्टर मिशन 2.0, एआई मिशन, नेशनल क्वांटम मिशन, इलेक्ट्रॉनिक कॉम्पोनेन्ट मेनुफैक्चरिंग स्कीम, डेटा सेंटर अर क्लाउड सर्विसेज सारू करी ज्यो प्रावधानां रो फायदो लेता थकां सेमीकंडक्टर अर डेटा सेंटर हब बणबा सारू प्रदेश पूरी तरह तैयार है।

000

संसद मांय काल पेश करी ज्यो केंद्रीय बजट मांय उत्तर पश्चिम रेलवे सारू 10 हजार 228 करोड़ रुपया राखण रो प्रस्ताव करी ज्यो है। रेल मंत्री अश्विनी वैष्णव आज नई दिल्ली ऊँ वीडियो कॉन्फ्रेंसिंग रे जरिये जयपुर मांय खबरनवीसां ने आ जाणकारी दीनी। वे बतायो के ई बजट मांय राजस्थान ने रेलवे सारू मिली रकम साल 2013 मांय मिल्या बजट री तुलना मांय करीब 15 गुणा बत्ती है। वे कहयो के प्रदेश मांय 56 हजार करोड़ रुपया रा खर्चा ऊँ 85 टेशनां ने और बेहतर बणावण रो काम चाल रह्यो है अर रेलों ने बिजली ऊँ चलावण रो काम करीब-करीब पूरो व्हे ग्यो है। उत्तर पश्चिम रेलवे रा महाप्रबंधक अमिताभ बतायो के जोन मांय डोढ़ हजार किलोमीटर ऊँ बत्ती लम्बी रेलवे लेणां रा काम चाल रह्यो है जद के डोढ़ हजार कि.मी सारू और प्रस्ताव भेजी ज्यो है। ई रे अलावा 2 हजार किलोमीटर लम्बी रेलवे लेणां रा सर्वे रो काम ई चाल रह्यो है। वे बतायो के 4 टेशन बेहतर बणायां पाछे उद्घाटन सारू तैयार है अर आवता 2 महीनां मांय 10 और टेशन उद्घाटन सारू तैयार व्हे जावेला।

000

संसद मांय राष्ट्रपति द्रौपदी मुर्मू रा अभिभाषण माथे धन्यवाद प्रस्ताव रा बारा मांय चर्चा सुरू व्ही। चर्चा सारू लोकसभा मांय 18 अर राज्यसभा मांय 16 घंटां री मियाद तैय करी ज्यो है। **लोकसभा मांय** धन्यवाद प्रस्ताव पेश करता थकां केन्द्रीय मंत्री अर भाजपा रा सांसद सर्बानंद सोनोवाल राष्ट्रपति रा अभिभाषण ने घणो खास बतायो। वे कहयो के प्रत्यक्ष लाभ अंतरण-डी.बी.टी. रे मार्फत पात्र लोगां रा खातां मांय 44 लाख करोड़ रुपया भेजी ज्यो है। वे डिजिटल इंडिया पहल रा महत्त्व माथे जोर दीनो। ई दौरान संसदीय कार्य मंत्री किरन रिजिजू लोकसभा मांय धन्यवाद प्रस्ताव रे दौरान विपक्ष रा नेता राहुल गांधी री टिप्पणियां री आलोचना करता थकां वां माथे सदन रा कायदा नी मानण रो आरोप मांड्यो। श्री रिजिजू कहयो के सशस्त्र बलां रा बारा मांय राहुल गांधी री टिप्पणियां

गैर—वाजिब है। वे कह्यो के अध्यक्ष हुकम दीनो है के पत्रिकावां या अखबारां रा लेखां रो जिक सदन मांय नी कर्यो जा सके है अर सदन मांय बहस कानून रे मुजब व्हेवणी चाहिजे। रिजीजू कह्यो के अध्यक्ष रा हुकम पाछे ई राहुल गांधी कानी ऊँ सदन मांय ओ मुद्दो उठावण माथे अड्या रेहवणो दुर्भाग्यपूर्ण है। वे कह्यो के सरुआत ऊँ ई राहुल गांधी नियमां री अनदेखी करता थकां ऐड़ी किताब रो जिक करणो सरु कर दीनो जिण रे छपण अर प्रामाणिकता रो साफ उल्लेख नी है।

ई दौरान सदन मांय खूब देर ताई हंगामो व्हतो रह्यो ज्यी पाछे सदन री कार्यवाही काल ताई टाळ दीरीजी।

000

मुख्यमंत्री भजनलाल शर्मा कह्यो है के केंद्र अर राज्य सरकार री योजनावां ने लागू करण री खास जिम्मेदारी सरपंचां माथे व्हे है। वे वी.बी. जी राम जी रा बारा मांय सरपंच संघ री ओर ऊँ आज जयपुर मांय राख्यी ज्या धन्यवाद कार्यक्रम मांय बोल रह्या हा। मुख्यमंत्री कह्यो के सरपंच गांवां रा विकास री मजबूत कड़ी है, ज्यां ऊँ जनता ने घणी उम्मीदां व्हे है। वे सरपंचां री काम र सराहवणा करता थकां कह्यो के गांवां री समस्यावां रो निपटारो अर विकास री नीतियां वां री मदद बगैर पूरी नी व्हे सके है।

श्री शर्मा कह्यो के राज्य सरकार सरपंचां रो कार्यकाल बधाता थकां वां ने प्रशासक बणाया है ताकि विकास रो काम चालतो रेहवे।

000

सरकार माई भारत बजट क्वेस्ट 2026 सरु कर रही है। युवा कार्य अर खेल मंत्री मनसुख मांडविया आ जाणकारी दीनी। वे बतायो के होड़ रो पहलो दौर 'माई भारत' पोर्टल माथे नाम मण्डायोड़ा नौजवानां सारु 17 फरवरी ताई खुल्यो रहवेला। ई पाछे हर राज्य अर केंद्र रा राज वाळा प्रदेश ऊँ बेहतरीन प्रदर्शन करण वाळा नौजवान चुण्या जावेला। चुणी ज्या लोग 17 फरवरी ऊँ 3 मार्च ताई चालण वाळा दूजा दौर मांय निबंध लिखण री होड़ मांय शामिल व्हेला। ई दौर मांय नौजवानां ने विकसित भारत री परिकल्पना रे मुजब केंद्रीय बजट ऊँ जुड्या आठ विषय दिया जावेला। होड़ री मैरिट लिस्ट 10 मार्च ने जारी करी जावेला। जीतण वाळां ने प्रधानमंत्री नरेंद्र मोदी सागे बातचीत रो ई मौको दियो जावेला।

000

झालावाड़ पुलिस ऑपरेशन क्लीन राइड रा तैत सरकारी भर्ती परीक्षावां रा उम्मीदवारां ने आवण—जावण सारु रोड़वेज री बसां मांय मुफ्त सफर रा सुबीता री योजना मांय फर्जीवाड़ा रो खुलासो कीनो है। एस.पी. अमित कुमार बतायो के ओ घोटाळो बस सारथी, कंडक्टर अर रोड़वेज कर्मचारियां री मिलीभगत ऊँ कर्यो जा रह्यो हो। एस.पी. कह्यो के मामला री जांच करी जा रही है।

000

मौसम विभाग आज बांसवाड़ा, बारां अर भीलवाड़ा जिलां मांय बारिश व्हेवण अर ओला पड़बा सारु चेतायो है। महकमा रे मुजब राज्य रा उत्तराद—आतूणी अर ऊगणी हलकां मांय आवता दो—तीन दिन घणी धुंअर रहवण रा आसार है। मौसम केंद्र जयपुर रा निदेशक राधेश्याम शर्मा बतायो के आवता कुछ दिनां मांय राज्य मांय कठे—कठे बादळां री गाज सागे बिरखा री संभावना है।

ई बीच प्रदेश रा लंकाऊ—ऊगणी हलकां मांय कठे—कठे हल्की बारिश व्ही। चित्तौड़गढ़ जिला रा भैंसरोड़गढ़ मांय 13 मिलीमीटर बरसात दर्ज करी ज्यी।

000